



大集四十九卷  
本草正下

武  
596  
28



武門  
596  
卷28

景岳全書卷之四十九大集

本草正

會稽 張介賓 會卿著

會稽 魯 超 謙菴訂



# 石草部

本草下

石斛 百四一

此藥有二種力皆微薄圓細而肉實者味微甘而淡其力尤薄本草云圓細者為上且謂其益精強陰壯筋補虛健脚膝敗冷痺卻驚悸定心志但此物性味最薄焉能滋補如此惟是扁大而鬆形如釵股者頗有苦味用除脾胃之火去膈雜善飢及營中蘊熱其性輕清和緩有從容分解之妙故能送火養陰除煩清肺下氣亦止消渴熱汗而諸家謂其厚腸胃健陽道煖水臟豈苦涼之性味所能也不可不辨

葛蒲 百四二

味辛微苦性温散風寒濕痺除煩悶欬逆上氣止心腹痛霍亂轉筋癰癩客忤開心氣胃氣行滯氣通九竅益心智明耳目去頭風淚下出聲音温腸胃煖丈夫水藏婦人血海禁止小便辟邪逐鬼及中惡卒死殺虫療惡瘡瘰癧疥欲散癰毒宜搗汁服用渣貼之若治耳痛宜作末炒熱絹裹罽之亦解巴豆大戟等毒

蒲黃 百四三

味微甘性微寒解心腹膀胱煩熱疼痛利小便善止血凉血活血消瘀血治吐血衄血痢血尿血通婦人經脉止崩中帶下月經不調妊婦胎漏墜胎血運血癥兒枕氣痛及跌撲血悶療瘡瘍消舌腫排膿消毒亦下乳汁亦止洩精凡欲利者欲固者宜炒熟用

澤瀉 百四四

味甘淡微鹹氣微寒氣味頗厚沉而降陰也陰中微陽入足太陽少陽其功長於滲水去濕故能行痰飲止嘔吐瀉痢通淋瀝白濁大利小便瀉伏火收陰汗止尿血療難產疝痛脚氣腫脹引藥下行經云除濕止瀉聖藥通淋利水仙丹第其性降而利善耗真陰久服能損目痠陽若濕熱壅閉而目不明者此以去濕故亦能明目

海藻 百四五

又甘草 海帶 昆布性用畧同

味苦鹹性微寒陰也降也善降氣清熱消膈中痰壅故善消頸項癭瘤結核及癰腫癥積利小便逐水氣治濕熱氣急腹中上下雷鳴療偏墜疝氣疼痛消奔豚水氣浮腫及百邪鬼魅熱毒

骨碎補 百四六

景岳全書

卷之四十九

十一

味微苦性温平乃足少陰厥陰肝腎藥也能活血止血補折傷療骨中斜毒風熱疼痛及痢後下虛或遠行或房勞或外感風濕以致兩足痿弱疼痛俱宜以四斤丸補陰藥之類佐而用之或炒熟研末用猪腰夾煨空心食之能治耳鳴及腎虛久痢牙疼

# 竹木部

竹瀝百四十七

味甘性微涼陰也降也治暴中風痰失音不語胸中煩熱止煩悶消渴丹溪曰凡風痰虛痰在胸膈使人癡狂及痰在經絡四肢皮裏膜外者非此不達不行

淡竹葉 百四十八

味甘淡氣平微涼陰中微陽氣味俱輕清上氣咳逆喘促消

痰涎解熱狂退虛熱煩躁不眠壯熱頭痛止吐血專涼心經亦清脾氣御風熱止煩渴生津液利小水解喉痺并小兒風熱驚癇

淡竹茹 百四十九

味甘微涼治肺痿唾痰唾血吐血衄血尿血胃熱嘔噦噎膈婦人血熱崩淋胎動及小兒風熱癲癇痰氣喘欬小水熱澀

天竹黃 百五十

味甘辛性涼降也陰中有陽善開風痰降熱痰治中風失音痰滯胸膈煩悶癲癇清心火鎮心氣醒脾疎肝明眼目安驚悸療小兒風痰急驚客忤其性和緩最所宜用亦治金瘡并內熱藥毒

官桂 百五十一

味辛甘氣大熱陽中之陽也有小毒必取其味甘者乃可用

桂性熱善於助陽而尤入血分四肢有寒疾者非此不能達  
 桂枝氣輕故能走表以其善調營衛故能治傷寒發邪汗瘧  
 傷風止陰汗肉桂味重故能溫補命門堅筋骨通血脈治心  
 腹寒氣頭疼欬嗽鼻鼈霍亂轉筋腰足臍腹疼痛一切沉寒  
 痼冷之病且桂為木中之王故善平肝木之陰邪而不知善  
 助肝胆之陽氣惟其味甘故最補脾土凡肝邪尅土而無火  
 者用此極妙與參附地黃同用最降虛火及治下焦元陽虧  
 乏與當歸川芎同用最治婦人產後血瘀兒枕腹痛及小兒  
 痘疹虛寒作癢不起雖善墮胎動血用須防此二證若下焦  
 虛寒法當引火歸元者則此為要藥不可誤執

丁香 百五二

味大辛氣溫純陽入腎胃肺藏能發諸香辟惡去邪溫中快  
 氣治上焦呃逆翻胃霍亂嘔吐解酒毒消痰癖奔豚陰寒心  
 腹脹滿冷痛煖下焦腰膝寒疼壯陽道抑陰邪除胃寒瀉痢  
 殺鬼疰蠱毒疔蝕諸蟲辟口氣堅齒牙及婦人七情五鬱小  
 兒吐瀉痘瘡胃寒灰白不發

白檀香 百五三

味辛氣溫能散風熱辟穢惡邪氣消腫毒逐鬼魅煎服之可  
 散冷氣止心腹疼痛定霍亂和胃氣開噎膈止嘔吐進飲食  
 又治面生黑子每晚以熱水洗拭磨汁塗之甚良

沉香 百五四

味辛氣微溫陽也可升可降其性煖故能抑陰助陽扶補相  
 火其氣辛故能通天徹地條達諸氣除轉筋霍亂和噤口瀉  
 痢調嘔逆胃翻喘急止心腹脹滿痲痺瘰癧瘰癧瘰癧瘰癧和脾  
 胃逐鬼疰惡氣及風濕骨節痲痺皮膚癢癢結氣

烏藥 百五五

本草綱目

卷之四十九

三

氣味辛溫善行諸氣入脾胃肝腎三焦膀胱諸經療中惡鬼  
氣蠱毒開胸膈除一切冷氣止心腹疼痛喘急霍亂反胃脹  
滿溫腸胃行宿食止瀉痢除天行疫瘴氣厥頭痛膀胱腎氣  
攻衝心腹疝氣脚氣癰疽疥癩及婦人血氣小兒蟲積亦止  
小便頻數氣淋帶濁并猶犬百病俱可磨汁灌治之

枸杞百五十六

味甘微辛氣溫可升可降味重而純故能補陰陰中有陽故  
能補氣所以滋陰而不致陰衰助陽而能使陽旺雖諺云離  
家千里勿食枸杞不過謂其助陽耳似亦未必然也此物微  
助陽而無動性故用之以助熱地最妙其功則明耳目壯神  
魂添精固髓健骨強筋善補勞傷尤止消渴真陰虛而臍腹  
疼痛不止者多用神效

地骨皮百五十七

枸杞根也南者苦味輕微有甘辛北者大苦性劣入藥惟南  
者為佳其性辛寒善入血分肝腎三焦胆經退陰虛血熱骨  
蒸有汗止吐血衄血解消渴療肺腎胞中陰虛伏火煎湯漱  
口止齒血凡不因風寒而熱在精髓陰分者最宜此物涼而  
一而不峻可理虛勞氣輕而辛故亦清肺假熱者勿用

厚朴百五十八

味苦辛氣大溫氣味俱厚陽中之陰可升可降有小毒用此  
者用其溫降散滯制用薑汁炒治霍亂轉筋消痰下氣止欬  
嗽嘔逆吐酸殺腸藏諸虫宿食不消去結水破宿血除寒濕  
瀉痢能煖脾胃善走冷氣總之逐實邪瀉膨脹散結聚治胸  
腹疼痛之要藥倘本元虛弱誤服脫人真氣孕婦忌用墮胎  
須知

棗仁百五十九

本草綱目

卷之四

四

味微甘氣平其色赤其肉味酸故名酸棗其仁居中故性主收斂而入心多眠者生用不眠者炒用寧心志止虛汗解渴去煩安神養血益肝補中收斂魂魄

杜仲 百六十

味甘辛淡氣溫平氣味俱薄陽中有陰其功入腎用薑汁或鹽水潤透炒去絲補中強志壯腎添精腰痛殊功足疼立效除陰囊寒濕止小水夢遺因其氣溫故煖子宮因其性固故安胎氣內熱火盛者亦當緩用

山茱萸 百六一

味酸澁主收斂氣平微溫陰中陽也入肝腎二藏能固陰補精煖腰膝壯陰氣澁帶濁節小便益髓興陽調經收血若脾氣大弱而畏酸者姑暫止之或和以甘草煨薑亦可

蘇木 百六二

味微甘微辛性溫平可升可降乃三陰經血分藥也少用則和血活血多用則行血破血主婦人月經不調心腹作痛血癖氣壅凡產後血瘀脹悶勢危者宜用五兩水煮濃汁服之亦消癰腫死血排膿止痛及打撲瘀血可敷若治破傷風宜為末酒服立效

川椒 百六三

味辛性熱有小毒本純陽之物其性下行陽中有陰也主溫中下氣開通腠理散肌表寒邪除藏府冷痛去胸腹留飲停痰宿食解鬱結溫脾胃止欬逆嘔吐逐寒濕風痛療傷寒溫瘧水腫濕疽除齒痛煖腰膝收陰汗縮小便溫命門止泄瀉下痢遺精脫肛殺虻虫鬼疰蠱毒蛇虫諸毒久服之能通神明實腠理和血脉堅齒牙生鬚髮明目調關節耐寒暑若中其毒惟冷水麻仁漿可以解之

胡椒 百六四

味辛性大熱純陽也善走氣分溫中下氣煖腸胃消宿食辟臭惡除寒濕寒痰寒飲吐水止反胃嘔吐霍亂虛寒脹滿心腹疼痛去冷積陰毒壯腎氣治大腸寒滑冷痢殺一切虫魚鱉蠶諸藥食陰凝之毒若治風虫牙痛須同萹荻為末熔蠟為細丸塞孔中即愈

金櫻子 百六五

味澁性平生者色青酸澁熟者色黃甘澁當用其將熟微酸而甘澁者為妙其性同澁澁可固陰治脫肛可補中益氣故善理夢遺精滑及崩淋帶漏止吐血衄血生津液安魂魄收虛汗飲虛火益精髓壯筋骨補五藏養血氣平欬嗽定喘急療怔忡驚悸止脾洩血痢及小水不禁此固陰養陰之佳品而人之忽之亦久矣此後咸宜珍之

槐花 百六六

味苦性寒清心肺脾肝大腸之火除五內煩熱心腹熱痰療眼目赤痛熱淚炒香嚼嚥治失音喉痺止吐血衄血腸風下血婦人崩中漏下及皮膚風熱涼大腸殺疳虫治癰疽瘡毒陰瘡濕癢痔漏解楊梅惡瘡下疳伏毒大有神效

栢子仁 百六七

味甘平性微涼能潤心肺養肝脾滋腎燥安神魂益志意故可定驚悸怔忡益陰氣美顏色療虛損益血止汗潤大腸利虛秘亦去口邪鬼魅小兒驚癇總之氣味清香性多潤滑雖滋陰養血之佳劑若欲培補根本乃非清品所長

枳殼 百六八

即枳實之遲收而大者較之枳實其氣畧散性亦稍緩功與枳實大類但枳實性重多主下行削堅而此之氣輕故多主



上行破氣通利關節健脾胃平肺氣止嘔逆反胃霍亂  
嗽消痰消食破心腹結氣癥瘕痔瘡開胸脇脹滿痰滯逐水  
腫水濕寫痢腸風痔漏肛門腫痛因此稍緩故可用之東胎  
安胎炙熱可熨痔腫虛者少用恐傷元氣

枳實 百六九

味苦微酸微寒氣味俱厚陰中微陽其性沉急於枳殼除脹  
滿消宿食削堅積化稠痰破滯氣平欬喘逐瘀血停水解傷  
寒結胸去胃中濕熱佐白朮亦可健脾佐大黃大能推蕩能  
損真元虛羸勿用

蔓荆子 百七十

味苦辛氣清性溫升也陽也入足太陽陽明厥陰經主散風  
邪利七竅通關節去諸風頭痛腦鳴頭沉昏悶搜肝風止目  
睛內痛淚出明目堅齒療筋骨間寒熱濕痺拘攣亦去小口

虫

五加皮 百七一

味辛性溫除風濕行血脉壯筋骨明目下氣治骨節四肢拘  
攣兩脚痺痛風弱五緩陰痿囊濕疝氣腹痛小便遺瀝女人  
陰癢凡諸浸酒藥惟五加皮與酒相合大能益人且味美也  
仙家重此謂久服可以長生故曰寧得一把五加不用金銀  
滿車雖未必然然亦必有可貴者

川棟子 百七十二

味苦性寒有小毒陰也能治傷寒瘟疫煩熱狂躁利小水瀉  
肝火小腸膀胱濕熱諸疝氣疼痛殺三蟲疥癩亦消陰痔丸  
散湯藥任意可用甄權言其不入湯使則失之矣

苦棟根 味大苦殺諸蟲尤善逐虻利大腸治遊風熱毒惡  
瘡苦酒和塗疥癬甚良

女貞子 一七三

味苦性涼陰也降也能養陰氣平陰火解煩熱骨蒸止虛汗消渴及淋濁崩漏便血尿血陰瘡痔漏疼痛亦清肝火可以明目止淚

桑白皮 百十四

味甘微辛微苦氣寒氣味俱薄升中有降陽中有陰入手太陰肺藏氣寒味辛故瀉肺火以其味甘故緩而不峻止喘嗽唾血亦解渴消痰除虛勞客熱頭痛水出高原故清肺亦能利水去寸白殺腹藏諸虫研汁治小兒天疳驚癇客忤及傳鵝口瘡大效作線可縫金瘡既瀉肺實又云補氣則未必然

黃檗 百七五

味苦微辛氣寒陰中微陽降也善降三焦之火制各以類但其性多沉尤專肝腎故曰足少陰木經足太陽厥陰之引經

也清胃火嘔噦蚘虫除伏火骨蒸煩熱去腸風熱痢下血逐二便邪火結淋上可解熱渴口瘡喉痺癰瘍下可去足膝濕熱痠痛痿廢此其性寒潤降去火最速丹溪言其制伏龍火補腎強陰然龍火豈沉寒可除水枯豈苦劣可補陰虛水竭得降愈凶撲滅元陽莫此為甚水未枯而火盛者用以抽薪則可水既竭而枯熱者用以補陰實難當局者慎勿認為補劑○予嘗聞之丹溪口火有二君火者人火也心火也可以濕伏可以水滅可以直折黃連之屬可以制之相火者天火也龍雷之火也陰火也不可以水濕折之當從其性而伏之惟黃柏之屬可以降之按此議論若有高見而實矯強之甚大是誤人夫所謂從其性者即內經從治之說也經曰正者正治從者反治正治者謂以水制火以寒治熱也從治者謂以火濟火以熱治熱也亦所謂甘溫除大熱也豈以黃連便

是正治黃栢便是從治乎卽曰黃連主心火黃栢主腎火然  
以便血溺血者俱宜黃連又豈非膀胱大腸下部藥乎治舌  
瘡口瘡者俱宜黃栢又豈非心脾上部藥乎總之黃連黃栢  
均以大苦大寒之性而曰黃連爲水黃栢非水黃連爲瀉黃  
栢爲補豈理也哉若執此說誤人多矣誤人多矣

梔子百七六

味苦氣寒味厚氣薄氣浮味降陰中有陽因其氣浮故能清  
心肺之火解消渴除熱鬱療時疾躁煩心中懊懣熱悶不得  
眠熱厥頭疼耳目風熱赤腫疼霍亂轉筋因其味降故能  
瀉肝腎膀胱之火通五淋治大小腸熱秘結五種黃疽三  
焦鬱火臍下熱鬱血氣吐血衄血血痢血淋小腹損傷瘀血  
若用佐使治有不同加茵陳除濕熱痘黃加豆豉除心火煩  
躁加厚朴枳實可除煩滿加生薑陳皮可除嘔歲同玄胡索

破熱滯瘀血腹痛此外如面赤酒破熱毒湯火瘡瘍腫痛皆  
所宜用伸景因其氣浮而苦極易動吐故用爲吐藥以去上  
焦痰滯丹溪謂其解鬱熱行結氣其性屈曲下行大能降火  
從小便泄去人所不知

郁李仁百七七

味苦辛陰中有陽性潤而降故能下氣消食利水道消面目  
四肢大腹水氣浮腫開腸中結氣滯氣關隔燥澀大便不通  
破血積食癖凡婦人小兒實熱結燥者皆可用

訶子百七八

味苦酸澁氣溫苦重酸輕性沉而降陰也能消宿食膨脹止  
嘔吐霍亂定喘止嗽破結氣安久痢止腸風便血降痰下氣  
開滯澁腸通達津液療女人崩中胎漏帶濁經亂不常若久  
痢肛門急痛或產婦陰痛者宜和蠟燒烟薰之或煎湯薰洗

亦可若痰嗽咽喉不利宜含數枚噉津殊效其有上焦元氣虛陷者當避其苦降之性

側栢百七九

味苦氣辛性寒善清血涼血止吐血衄血痢血尿血崩中赤白去濕熱濕痺骨節疼痛搗爛可傅火丹散疔腮腫痛熱毒及湯火傷止痛滅癩炙搗可罨凍瘡燒汁塗髮可潤而使黑  
辛夷百八十 一名木筆 一名迎春

氣味辛溫乃手太陰足陽明之藥能解寒熱憎寒體噤散風熱利九竅除頭風腦痛眩暈癢癢癩面腫引齒皮痛苦治鼻塞涕出鼻淵鼻斂鼻瘡及痘後鼻瘡並宜為末入麝香少許以葱白蘸藥點入數次甚良

皂角百八一

氣味辛鹹性溫有小毒善逐風痰利九竅通關節治頭風殺

諸虫精物消穀導痰除欬嗽心腹氣結痰痛脹滿閉中風口噤治咽喉痺寒腫痛行肺滯通大腸秘結墮胎破堅癥消腫毒及風癬疥癩燒烟薰脫肛腫痛可為丸散不入湯藥  
巴豆百八二

味辛性熱有大毒可升可降善開闕破癥堅積聚逐痰飲殺諸惡虫毒蠱毒通秘結消宿食攻藏府停寒生冷壅滯心腹疼痛瀉痢驚癇諸水氣疰氣下活胎死胎逐瘀血血積及消癰瘍疔毒惡瘡去癰肉惡肉腐肉排膿消腫喉痺牙疼諸證然其性剛氣烈無處不到故稱為斬關奪門之將若誤用之則有推牆倒壁之虞若善用之則有戡亂調中之妙用者所當慎察

密蒙花百八三

味甘平性微寒入肝經潤肝燥專理目疾療青盲去赤腫多

淚消目中赤脉膚翳羞明畏日及小兒瘡痘疔氣攻目風熱  
糜爛雲翳遮睛制用之法宜蜜酒拌蒸三次日乾用  
雷丸百八四

味苦性寒有小毒殺三虫逐蠱毒諸毒降胃中實熱痰火癩  
狂除百邪惡氣并一應血積氣聚

大楓子百八五

味辛性熱有毒能治風癱疥癩攻毒殺虫亦療楊梅諸瘡  
蕪荑百八六

味辛平性溫主心腹冷氣癥積疼痛散肌膚風濕淫淫如虫  
行殺三虫去寸白及諸惡虫毒療腸風痔漏惡瘡和猪脂搗  
塗熱瘡和蜜可治濕癬

茯苓百八七

味甘淡氣平性降而滲陽中陰也有赤白之分雖本草言赤  
瀉丙丁白入壬癸然總不失為泄物故能利竅去濕利竅則  
開心益智導濁生津去濕則逐水燥脾補中健胃祛驚癰厚  
腸藏治痰之本助藥之降以其味有微甘故曰補陽但補少  
利多故多服最能損目久弱極不相宜若以人乳拌晒乳粉  
既多補陰亦妙

茯神百八八

附根而生近故能入心經通心氣補健忘止恍惚驚悸雖本  
草所言如此然總不外於滲降之物與茯苓無甚相遠也

猪苓百八九

味微苦甘氣平陽中陰也性善降滲入膀胱腎經通淋消水  
腫除濕利小便因其苦故能泄滯因其淡故能利竅亦解傷  
寒濕熱腳氣白濁亦治妊娠子淋胎腫

桑寄生百九十

味苦性涼主女子血熱崩中胎漏固血安胎及產後血熱諸疾去風熱濕痺腰膝疼痛長鬚眉堅髮齒涼小兒熱毒癰疔瘡癩

琥珀百九一

味甘淡性平安五藏清心肺定魂魄鎮癩癩殺邪鬼精魅消痰血痰延解蠱毒破癥結通五淋利小便明目磨翳止血生肌亦合金瘡傷損

松香百九二

味苦辛溫治癰疽惡瘡頭瘍白癩風濕疥癬酒者糊丸可治歷節風痛亦治婦人崩帶煎膏則活血生肌排膿止痛塞牙孔殺虫傳刺入肉中自出加銅末研搽大治金瘡折傷

乳香百九三

味苦辛性溫微熱辟邪惡諸氣治霍亂通血脈止大腸血痢痰痛及婦人氣逆血滯心腹作痛消癰疽諸毒托裏護心活血定痛舒筋脈療折傷煎膏止痛長肉

沒藥百九四

味苦氣平能破血散血消腫止痛療金瘡杖瘡諸惡瘡痔漏癰腫破宿血癥瘕及墮胎產後血氣作痛凡治金刃跌墜損傷筋骨心腹血瘀作痛者並宜研爛熱酒調服則推陳致新無不可愈

阿魏百九五

味苦辛性熱有毒其氣辛臭乃能辟奪臭氣逐瘟疫瘴瘧傳尸鬼氣惡氣療霍亂隔噎癰疔心腹疼痛殺諸小虫牙蟲破癥積消癥塊除蠱毒及一切葷菜牛羊魚肉諸毒或散或丸

樟腦百九六

味辛微苦性熱善通關竅破滯氣辟中惡邪氣治疥癬殺虫  
除蠹著鞵中去脚氣燒烟薰衣筐席簟除蚤虱壁虱北方新  
生小猫極多跳蚤用此拌麩研勻摻擦之則盡落無遺亦妙  
方也

龍腦百九十七 卽冰片

味微甘大辛敷用者其涼如水而氣雄力銳性本非熱陽中  
有陰也善散氣散血散火散滯通竅辟惡逐心腹邪氣療喉  
痺腦痛鼻嚏齒痛傷寒舌出小兒風痰邪熱急驚痘疔黑陷  
凡氣壅不能開達者咸宜佐使用之亦通耳竅散目熱去目  
中赤膚翳障逐三虫消五痔療一切惡瘡聚毒下疳痔漏疼  
痛亦治婦人氣逆難產研末少許新汲水服之則下以熱酒  
服之則能殺人凡用此者宜少而暫多則走散直氣大能損  
人

血竭百九十八

味甘鹹微瀋性平善破積血止痛生肌療金瘡折傷打損血  
瘀疼痛內傷血逆婦人血氣凝滯亦能生血補虛具可爲末  
酒服并治一切惡瘡癬疥久不合口然性能引膿不宜多用  
蘆薈百九十九

味大苦性大寒氣味俱厚能升能降除風熱煩悶清肺胃鬱  
火涼血清肝明目治小兒風熱急驚癩癩五疳熱毒殺三虫  
及痔漏熱瘡單用殺疔虻吹鼻治腦疳鼻熱鼻癢鼻痔研末  
傅虫牙同甘草敷濕癬殺虫出黃水極妙

乾漆二百

味辛性溫有毒能療絕傷續筋骨殺三虫去虻蟲削年深堅  
結之積滯破日久凝聚之瘀血用須炒熟入藥不爾損人腸  
胃若外著其毒而生漆瘡者惟杉木湯紫蘇湯蟹湯浴之可

解或用香油調鐵銹塗之

蘇合口油二百一

味甘辛性溫能辟邪惡諸氣殺鬼魅蠱毒中毒癩癧溫瘧  
止氣送疼痛亦通神明可除夢魘

孩兒茶二百二

味苦微澇性涼能降火生津清痰涎欬嗽治口瘡喉痺煩熱  
止消渴吐血衄血便血尿血濕熱痢血及婦人崩淋經血不  
止小兒疳熱口疳熱瘡濕爛諸瘡斂肌長肉亦殺諸蟲

### 穀部

麥芽二百三

味甘微鹹氣溫善於化食和中破冷氣消一切米麩諸果食  
積去心腹脹滿止霍亂除煩熱消痰飲破癥結寬腸下氣病  
久不食者可借此谷氣以開胃元氣中虛者毋多用此以消  
腎亦善催生落胎單服二兩能消乳腫其耗散血氣如此而  
脾胃虛弱飲食不消方中每多用之何也故婦有胎妊者不  
宜多服

神麩二百四

味甘氣平炒黃入藥善助中焦土臟健脾煖胃消食下氣化  
滯調中逐痰積破癥瘕運化水穀除霍亂脹滿嘔吐其氣腐  
故能除濕熱其性澁故又止瀉痢療女人胎動因滯治小兒  
腹堅因積若婦人產後欲回乳者炒斫酒服二錢日二卽止  
甚驗若閃挫腰痛者淬酒溫服最良

白扁豆二百五

味甘氣溫炒香用之補脾胃氣虛和嘔吐霍亂解河豚酒毒  
止瀉痢溫中亦能清暑治消渴欲用輕清緩補者此為最當



慧仁二百六

味甘淡氣微涼性微降而滲故能去濕利水以其去濕故能利關節除脚氣治痿弱拘攣濕痺消水腫疼痛利小便熱淋亦殺虻虫以其微降故亦治欬嗽唾膿利膈開胃以其性涼故能清熱止煩渴上氣但其功力甚緩用為佐使宜倍

綠豆二百七

味甘性涼能清火清痰下氣解煩熱止消渴安精神補五藏陰氣去胃火吐逆及吐血衄血尿血便血濕熱瀉痢腫脹利小便療丹毒風疹皮膚燥滿大便秘結消癰腫痘毒湯火傷痛解酒毒鴆毒諸藥食牛馬金石毒尤解砒霜大毒或川囊作枕大能明目日并治頭風頭痛

粟殼二百八

味微甘性多澁泡去筋膜醋拌炒用甚固大腸久痢滑瀉必用須加甘補同煎久虛咳嗽劫藥欲用須辨虛實脫肛遺精俱所當用濕熱下痢乃非所宜

麻仁二百九

即黃麻也亦名大麻

味甘平性滑利能潤心肺滋五藏利大腸風熱結燥行水氣通小便濕熱秘澁五淋去積血下氣除風濕頑痺關節血燥拘攣止消渴通乳汁產難催生經脉阻滯凡病多燥澁者宜之若下元不固及便溏陽痿精滑多帶者皆所忌用

### 果部

芡實二百十

味甘氣平入脾腎兩臟能健脾養陰止渴治腰膝疼痛強志益神聰明耳目補腎固精治小便不禁遺精白濁帶下延年耐老或散丸或煮食皆妙但其性緩難收奇效

杏仁二二一

味苦辛微甘味厚於氣降中有升有毒入肺胃大腸經其味辛故能入肺潤肺散風寒止頭痛退寒熱欬上氣喘急發表解邪療溫病脚氣其味苦降性最疾觀其澄水極速可知故能起氣逆上衝消胸腹急滿脹痛解喉痺消痰下氣除驚癩煩熱通大腸氣閉乾結亦殺狗毒佐半夏生薑散風邪欬嗽佐麻黃發汗逐傷寒表邪同門冬乳酥煎膏潤肺治欬極妙同輕粉研勻油調敷廣瘡腫毒最佳尤殺諸虫牙虫及頭面黚斑瘡炮元氣虛陷者勿用恐其沉降太泄

桃仁二二二

味苦辛微甘氣平陰中有陽入手足厥陰經去皮尖用善治瘀血血閉血結血燥通血隔破血癥殺三虫潤大便逐鬱滯止鬼疰血逆疼痛膨脹療跌撲損傷若血枯經閉者不可妄

木瓜二二三

味酸氣溫用此者用其酸欽酸能走筋欽能固脫入脾肺肝腎四經亦善和胃得木味之正故尤專入肝益筋走血療腰膝無力脚氣引經所不可缺氣滯能和氣脫能固以能平胃故除嘔逆霍亂轉筋降痰去濕行水以其酸收故可欽肺禁痢止煩滿止渴

陳皮二二四

味苦辛性溫散氣實痰滯必用留白者微甘而性緩去白者用辛而性速瀉脾胃痰濁肺中滯氣消食開胃利水通便吞酸噯腐反胃餽雜飢逆脹滿堪除嘔吐惡心皆效通達上下解酒除虫表裏俱宜癰疽亦用尤消婦人乳癰并解魚肉諸

毒

味苦辛微酸味厚沉也陰中之陽苦能去滯酸能入肝又入少陽三焦膽府剖堅癖除脇痛解鬱怒劫疝踈肝破滯氣寬胸消食老弱虛羸戒之勿用

味辛澁微苦微甘氣微溫味厚氣薄降中有升陰中陽也能消宿食解酒毒除痰癖宜壅滯溫中快氣治腹脹積聚心腹疼痛喘急通關節利九竅逐五蟲奔豚膀胱諸氣殺三蟲除脚氣療諸瘧瘴癘濕邪本草言其治後重如馬奔此亦因其性溫行滯而然若氣虛下陷者乃非所宜又言其破氣極速較枳壳青皮尤甚若然則廣南之人朝夕笑墜而無傷又豈破氣極速者總之此物性溫而辛故能醒脾利氣味甘兼澁故能固脾壯氣是誠行中有留之劑觀鶴林玉露云飢能使

之飽飽能使之飢醉能使之醒醒能使之醉於此四句詳之可得其性矣○其服食之法小者氣烈供以入藥廣中人惟用其大而扁者以米泔水浸而待用每一枚切四片每服一片外用細石灰以水調如稀糊亦預制待用時以萹葉一片抹石灰一二分入檳榔一片裹而嚼服蓋檳榔得石灰則滑而不澁石灰萹葉得檳榔則甘而不辣服後必身面俱煖微汗微醉而胸腹豁然善解吞酸消宿食辟嵐瘴化痰醒酒下氣健脾開胃潤腸殺蟲消脹回大便止瀉痢○又服法如無萹葉即以肉桂或大茴香或陳皮俱可代用少抹石灰夾而食之然此三味之功多在石灰萹葉以其能燥脾溫胃也然必得檳榔為助其功始見此物理相成之妙若有不可意測者○一大約此物與烟性畧同但烟性峻勇用以散表逐寒則烟勝於此檳榔稍緩用以和中煖胃則此勝於烟二者

皆壯氣辟邪之要藥故滇廣中人一日不可少也○又習俗之異在廣西用老檳榔滇中人用清嫩檳榔廣東人多在連殼醃檳榔亦各得其宜耳

烏梅 二一七

味酸澁性溫平下氣除煩熱止消渴吐逆反胃霍亂治虛勞骨蒸解酒毒歛肺癰肺痿欬喘急消癰疽瘡毒喉痺乳蛾澹腸止冷熱瀉痢便血尿血崩淋帶濁遺精夢泄殺虫伏虻解虫魚馬汗硫黃毒和紫蘇煎湯解傷寒時氣瘴瘧大能作汗取肉燒存性研末傅金瘡惡瘡去腐肉斲肉死肌一夜立盡亦奇方也

山查 二一八

味甘微酸氣平其性善於消滯用此者川其氣輕故不甚耗真氣善消宿食痰飲吞酸去瘀血疼痛行結滯啟膨脹潤腸胃去積塊亦祛頑疝仍可健脾小兒最宜亦發瘡疹婦人產後兒枕痛惡露不盡者煎汁入沙糖服之立效煮汁洗漆瘡亦佳腸滑者少用之

甜瓜蒂 二一九 一名苦丁香

味苦性寒有毒陰中有陽能升能降其升則吐善涌濕熱頑痰積飲去風熱頭痛癩癧喉痺頭目眩暈胸膈脹滿并諸惡毒在上焦者皆可除之其降則瀉善逐水濕痰飲消浮腫水膨殺蠱毒虫毒凡積聚在下焦者皆能下之蓋其性峻而急不從上出即從下出也若治鼻中瘰肉不聞香臭當同麝香細辛為末以綿裹塞鼻中日一換之當漸消縮

大腹皮 二百二十

味微辛性微溫主冷熱邪氣下一切逆氣滯氣攻衝心腹大腸消痰氣吞酸痞滿止霍亂逐水氣浮腫脚氣瘴瘧及婦人

胎氣惡阻脹悶並宜加薑鹽同煎凡用時必須酒洗炒過恐  
其有鳩鳥毒也

吳茱萸二二二

味辛苦氣味俱厚升少降多有小毒能助陽健脾治胸膈停  
寒脹滿痞塞化滯消食除吞酸嘔逆霍亂心腹音冷中惡絞  
痛寒痰逆氣殺諸虫鬼魅邪疰及下焦肝腎膀胱寒疝陰毒  
疼痛止痛瀉血痢厚腸胃去濕氣腸風痔漏腳氣水腫然其  
性苦善降若氣陷而元氣虛者當以甘補諸藥制而用之

## 菜部

山藥二二二

味微甘而淡性微澁所以能健脾補虛澁精固腎治諸虛百  
損療五勞七傷第其氣輕性緩非堪專任故補脾肺必主參

朮補腎水必君菜地澁帶濁須破故同研固遺泄仗兔絲相  
濟諸凡固本丸藥亦宜搗末爲糊總之性味柔弱但可用爲  
佐使

乾薑二二三

味辛微苦性溫熱生者能散寒發汗熟者能溫中調脾善通  
神明去穢惡通四肢開竅閉五藏六府消痰下氣除轉筋霍  
亂逐風濕冷痺陰寒諸毒寒痞脹滿腰腹痛撲損瘀血夜  
多小便孫真人曰嘔家聖藥是生薑故凡脾寒嘔吐宜兼溫  
散者當以生薑煨熟用之若下元虛冷而爲腹疼瀉痢專宜  
溫補者當以乾薑炒黃用之若產後虛熱虛火盛而唾血痢  
血者炒焦用之若炒至黑炭已失薑性矣其亦有用以止血  
者用其黑澁之性已耳若陰盛隔陽火不歸元及陽虛不能  
攝血而爲吐血衄血下血者但宜炒熟留性用之最爲止血

之要藥若陰虛內熱多汗者皆忌用薑

大茴香二二四

味辛氣溫入心腎二藏氣味香甜能升能降最煖命門故善逐膀胱寒滯疝氣腰疼亦能溫胃止吐調中止痛除霍亂反胃齒牙口疾下氣解毒兼理寒濕脚氣調和諸饌逐臭生香小茴香二二五

氣味畧輕治亦同前但大茴性更煖而此則稍溫耳

白芥子二二六

味大辛氣溫善開滯消痰療欬嗽喘急反胃嘔吐風毒流注四肢疼痛尤能祛辟冷氣解肌發汗消痰癰瘡痞除脹滿極速因其味厚氣輕故開導雖速而不甚耗氣既能除脇肋皮膜之痰則他近處者不言可知善調五藏亦熨散惡氣若腫毒乳癰痰核初起研末用醋或水調傅甚效

黃蘗子二二七

味大辛氣溫氣味俱厚降也善於破氣消痰定喘除脹利大小便有推牆倒壁之功研水攪薄飲之立吐風痰盡出胃有氣食停滯致成鼓脹者非此不除同醋研敷大消腫毒中氣不足切忌妄用

葱二二八

味辛性溫善散風寒邪氣通關節開腠理主傷寒寒熱天行時疾頭痛筋骨酸疼行滯氣除霍亂轉筋奔豚脚氣陰邪寒毒陽氣脫陷心腹疼痛及虫積氣積飲食毒百藥毒利大小便下痢下血小兒盤腸內釣婦人溺血通乳汁散乳癰消癰疽腫毒擣罨傷寒結胸及金瘡折傷血瘀血出疼痛不止塗狗犬傷亦制蚯蚓毒

蒜二二九

味辛性溫有小毒善理中溫胃行滯氣辟肥膩開胃進食消  
寒氣寒痰麩積食積魚肉諸積邪痺膨脹宿滯不安殺溪毒  
水毒蠱毒蛇蟲毒擣爛可灸癰疽塗疔腫傳蛇虫沙虱毒甚  
良

韭菜一百三十

味辛甘微瀉性溫善溫中安五藏和胃氣健脾氣除濁氣開  
胃進食祛心腹痼冷痞癖隔噎滯氣止消渴瀉痢膿血腹中  
冷痛壯腎氣煖腰膝療洩精帶濁俱宜常煮食之大能益人  
若欲消胃脘瘀血作痛及中風痰盛失音上氣喘急或中飲  
食藥毒或暴見吐血衄血冰血打撲瘀血婦人經滯血逆上  
衝心腹或被狂犬蛇虫惡毒勢在危急者俱宜擣生韭汁服  
之或從吐出或從內消皆得愈也或用煎湯薰產婦血暈亦  
可洗腸痔脫肛

韭子一三三

味辛性溫陰中陽也宜炒黃用之主夢洩遺精尿血煖腰膝  
壯陽道治鬼交補肝腎命門止小便頻數遺尿及婦人白淫  
白帶陰寒小腹疼痛

百合二三二

味微甘淡氣平功緩以其甘緩故能補益氣血潤肺除嗽定  
魄安心逐驚止悸緩時疫咳逆解乳癰喉痺兼治癰疽亦解  
蠱毒潤大小便消氣逆浮腫仲景用之以治百合證者蓋欲  
藉其平緩不峻以收失散之緩功耳虛勞之嗽用之頗宜

蒲公英 一三三 卽黃花地丁

味微苦氣平獨莖一花者是莖有極者非入陽明太陰少陽  
厥陰經同忍冬煎汁少加酒服潰堅消腫散結核療癰最佳  
破滯氣解食毒出毒刺俱妙若婦人乳癰肘水酒煮飲以用

封之立消

# 金石部

金箔二三四

味辛平性寒生者有毒氣沉質重降也陰也能鎮心神降邪火墜痰涎療風熱上壅吐血衄血神魂飛蕩狂邪躁擾及小兒驚風癲癩痰滯心竅上氣欬喘安魂魄定心志凡邪盛於上宜降宜清者皆所常用若陽虛氣陷滑洩清寒者俱當避之

水銀二三五

性辛寒有大毒能利水道去熱毒同黑鉛結砂則鎮噉痰涎同硫黃結砂則療劫危疾極善墮胎殺諸虫及疥癬癩瘡凡有虫者皆宜之亦善走經絡透骨髓逐楊梅瘋毒其他內證不宜輕用頭瘡亦不可用恐入經絡必緩筋骨百藥不治也李時珍曰水銀乃至陰之精稟沉著之性得凡火煨煉則飛騰靈變得人氣薰蒸則入骨鑽筋絕陽蝕腦陰毒之物無似之者而大明言其無毒本經言其久服神仙甄權言其還丹元母抱朴子以爲長生之藥六朝以下貪生者服食致成廢篤而喪厥軀不知若干人矣方士固不足道本草其可妄言哉水銀但不可服食爾而其治病之功不可掩也

輕粉二三六

味微辛性溫燥有大毒升也陽也治痰涎積聚消水腫鼓脹直達病所尤治瘰癧諸毒瘡去腐肉生新肉殺瘡癬疥虫及鼻上酒齙風瘡癢癢然輕粉乃水銀加鹽礬升鍊而成其以金火之性燥烈流走直達骨髓故善損齒牙雖善劫痰涎水濕瘡毒涎從齒縫而出邪得劫而暫開病亦隨愈然用不得



法則金毒竄入經絡留而不出而傷筋敗骨以致筋攣骨痛  
癰瘡疔漏遂成廢癩其害無窮嘗見丹家升鍊者若稍失固  
濟則雖以鐵石爲鼎亦必爆裂而矧以人之藏府血氣乎陳  
文中曰輕粉下痰而損心氣小兒不可輕用傷脾敗陽必變  
他證初生者尤宜慎之

銅青二三七

卽銅綠

此銅之精華惟醋制者良礪制者毒也味酸澁性收斂善治  
風眼爛弦流淚合金瘡止血明目去膚赤瘰肉治惡瘡口鼻  
疔瘡若治走馬牙疔宜同滑石杏仁等分爲末擦之立愈

硃砂二三八

味微甘性寒有大毒通稟五行之氣其色屬火也其液屬水  
也其體屬土也其氣屬木也其入屬金也故能通五藏其入  
心可以安神而走血脉入肺可以降氣而走皮毛入脾可逐  
痰涎而走肌肉入肝可行血滯而走筋膜入腎可逐水邪而  
走骨髓或上或下無處不到故可以鎮心逐痰祛邪降火治  
驚癇殺虫毒祛蠱毒鬼魅中惡及瘡瘍疥癬之屬但其體重  
性急善走善降變化莫測用治有餘乃其所長用補不足及  
長生久視之說則皆謬妄不可信也若同參芪歸朮兼朱砂  
以治小兒亦可取效此必其虛中挾實者乃宜之否則不可  
槩用

銀朱二三九

乃水銀同硫黃升煉而成味辛溫有毒破積滯劫痰涎善療  
瘡癰惡瘡殺虫毒蚤虱惟燒烟薰之或以棗肉拌烟擦之其  
功尤捷

靈砂一百四十

味甘性溫主五藏百病養神志安魂魄通血脉明耳目調和  
五臟主上盛下虛痰涎壅盛頭旋吐逆霍亂反胃心腹冷痛

升降陰陽既濟水火久服通神明殺精魅惡鬼小兒驚吐其效如神研末糯米糊為丸棗湯服最為鎮墜神丹也或以陰陽水送下尤妙○按胡演丹藥秘訣云升靈砂法用新鍋安逍遙爐上以密措鍋底文火下燒入硫黃二兩融化投水銀半斤以鐵匙急攪作青砂頭如有焰起噴醋解之待汞不見星取出細研盛入水火鼎內鹽泥固濟下以自然火升之乾水十二盞為度取出如束鍼紋者成矣

硫黃 二四一

味苦微酸性熱有毒療心腹冷積冷痛霍亂欬逆上氣及冷風頑痺寒熱腰腎久冷脚膝疼痛虛寒久痢滑洩壯陽道補命門不足陽氣暴絕婦人血結小兒慢驚尤善殺蟲除疥癬惡瘡老人風秘用宜鍊服亦治陰證傷寒厥逆煩躁腹痛脉伏將危者以硫黃為末艾湯調服二三錢即可得睡汗出而愈

雄黃 二四二

味苦甘辛性溫有毒消痰涎治癩癧鼠瘡瘧疾寒熱伏暑瀉痢酒癖頭風眩暈化痰血殺精物鬼疰蠱毒邪氣中惡腹痛及蛇虺百虫獸毒疥癩疔虫匿瘡去鼻中瘰肉癰疽腐肉并鼠瘻廣瘡疽痔等毒欲逐毒蛇無如燒烟薰之其畏遁尤速自然銅 二四三

味辛平性涼能療折傷散瘀血續筋骨排膿止疼痛亦鎮心神安驚悸宜研細水飛用或以酒磨服然性多燥烈雖其接骨之功不可堪而絕無滋補之益故用不可多亦不可專任也

黃丹 二四四

味辛微鹹微澁性重而收大能燥濕故能鎮心安神墜痰降火治霍亂吐逆欬嗽吐血鎮驚癰癩狂客忤除熱下氣止瘡

止痢禁小便解熱毒殺諸虫毒治金瘡火瘡濕爛諸瘡血溢  
止痛生肌長肉收陰汗解狐臭亦去翳障明目

白礬 二四五

味酸澁性涼有小毒所用有四其味酸苦可以涌泄故能吐  
下痰涎治癩癩黃疽其性收澁可固脫滑故能治崩淋帶下  
腸風下血脫肛陰挺欵金瘡止血燒枯用之能止牙縫出血  
辟狐腋氣收陰汗脚汗其性燥可治濕邪故能止瀉痢欵浮  
腫湯洗爛弦風眼其性毒大能解毒定痛故可療癰疽疔腫  
鼻鼈息肉喉痺癩癧惡瘡疥癬去腐肉生新肉及虎犬蛇虫  
蠱毒或丸或散或生或枯皆有奇效

石脂 二四六

味甘澁性溫平脂有五色而今之入藥者惟赤白二種乃手  
足陽明足厥陰少陰藥也其味甘而溫故能益氣調中其性

澇而重故能收濕固下調中則可療虛煩驚悸止吐血衄血  
壯筋骨厚腸胃除水濕黃疸癰腫瘡毒排膿長肉止血生肌  
之類是也固下則可治夢泄遺精腸風瀉痢血崩帶濁固大  
腸收脫肛痔漏陰瘡之類是也又治產難胞衣不出東垣曰  
胞衣不出惟澁劑可以下之卽此是也然脂有五種雖在木  
經言各隨五色補五藏又云白入氣分赤入血分第五脂之  
性味畧同似亦不必強分者且其性粘如膏故用固爐鼎甚  
良

爐甘石 二四七

味甘澁性溫能止血消腫毒生肌欵瘡口去目中翳膜赤腫  
收濕爛同龍腦點治目中一切諸病宜用片子爐甘其色瑩  
白經火煨而鬆膩味澁者爲上制宜炭火煨紅童便淬七次  
研粉水飛過晒用若煨後堅硬不鬆不膩者不堪也

蓬砂 二四八

味鹹微甘陰也降也消痰涎止欬嗽解喉痺生津液除上焦濕熱噎膈癥瘕瘀血退眼目腫痛翳障口齒諸病骨哽惡瘡或為散丸或噙化燕津俱可

水粉 二四九 即官粉亦名胡粉

味辛性寒有毒善殺虫墮胎治癰疽瘡毒濕爛諸瘡下疳瘻潰不收亦治疥癬狐臭黑鬚髮雖亦能墜痰消食然惟外證所宜而內傷諸病似亦不宜用之

密陀僧 二百五十一

味鹹平有小毒能鎮心神消痰涎治驚癇欬嗽嘔逆反胃瘧疾下痢止血殺虫消積聚治諸瘡腫毒鼻齩面黥汗斑金瘡五痔辟狐臭收陰汗脚氣

石膏 二五二

味甘辛氣大寒氣味俱薄體重能沉氣輕能升陰中有陽欲其緩者煨用欲其速者生用用此者用其寒散清肅善祛肺胃三焦之火而尤為陽明經之要藥辛能出汗解肌最逐溫暑熱證而除頭痛甘能緩脾清氣極能生津止渴而卻熱煩邪火盛者不食胃火盛者多食皆其所長陽明實熱牙疼太陰火盛痰喘及陽狂熱結熱毒發斑發黃火載血上大吐大嘔大便秘等證皆當速用胃虛弱者忌服陰虛熱者禁嘗若誤用之則敗陽作瀉必反害人

滑石 二五三

味微甘氣寒性沉滑降中有升入膀胱大腸經能清三焦表裏之火利六府之澀結分水道逐瘀血通九竅行津液止煩渴除積滯實大腸治瀉痢淋秘白濁療黃疸水腫脚氣吐血衄血金瘡出血諸濕爛瘡腫痛通乳亦佳墮胎亦捷

景岳全書 卷之四十九  
青礞石 二五三

味微甘微鹹其性下行降也陰也乃肝脾之藥此藥重墜制以硝石其性更利故能消宿食癥積頑痰治驚癇欬喘急實鑑言礞石為治痰利驚之聖藥若吐痰在水上以石木摻之痰即隨水而下則其沉墜之性可知楊士瀛謂其功能利痰然性非胃家所好而王隱君謂痰為百病母不論虛實寒熱槩用滾痰丸通治百病豈理也哉是以實痰堅積乃其所宜然久病痰多者必因脾虛人但知滾痰丸可以治痰而不知虛痰服此則百無一生矣

朴硝 二五四

味苦鹹辛氣寒陰也降也有毒其性峻速鹹能軟堅推逐陳積化金石藥毒去六腑壅滯脹急大小便不通破瘀血堅癥實痰却濕熱疫痢傷寒脹閉熱狂消癰腫排膿凡屬各經實熱悉可為除孕婦忌用最易墮胎虛損誤吞傷生反掌

玄明粉 二五五

味辛微甘性冷沉也陰也降心火祛胃熱消痰涎平傷寒實熱狂躁去胸膈藏腑宿滯癥瘕通大便秘結陰火疼痛亦消癰疽腫毒

海石 二五六

味鹹性微寒陽中陰也善降火下氣消食消熱痰化老痰除癭瘤結核解熱渴熱淋止痰嗽喘急消積塊軟堅癥利水濕疝氣亦消瘡腫

花蓋石 二五七

此藥色如硫黃黃石中間有淡白點故名也李時珍曰此藥雋無氣味今嘗試其氣平其味澁而酸蓋厥陰經血分藥也其功專於止血能使血化為水酸以收之也若治金瘡出血

則不必制但刮末傅之則合仍不作膿及治一切損傷失血  
又療婦人惡血血暈下死胎落胞衣去惡血血去而胎胞自  
落也凡入丸散須用罐固濟火煨過研細水飛用之

代赭石 二五八

味微甘性涼而降血分藥也能下氣降痰清火除胸腹邪毒  
殺鬼物精氣止反胃吐血衄血血痺血痢血中邪熱大人小  
兒驚癇狂熱入藏腸風痔漏脫精遺尿及婦人赤白帶下難  
產胞衣不出月經不止俱可為散調服亦治金瘡生肌長肉

礞砂 二五九

味鹹苦大辛性大熱有毒善消惡肉腐肉生肌傳金瘡生肉  
去目翳弩肉除痣鱗疣贅亦善殺蟲毒水調塗之或研末摻  
之立愈本草言其消瘀血宿食破結氣止反胃肉食飽脹煖  
子宮大益陽事但此物性熱大毒能化五金入石人之藏腑  
豈能堪此故用以治外則可用以服食則不宜也若中其毒  
惟生綠豆研汁飲一二升乃可解之

青鹽 二百六十

味鹹微甘性涼能降火消痰明目除目痛益腎氣除五藏癥  
結心腹積聚吐血尿血齒牙疼痛出血殺毒虫除疥癬諸虫  
及斑蝥莞青諸毒此鹽不經火煉而成其味稍甘雖性與大  
鹽畧同而滋益之功則勝之

石灰 二六一

味辛溫有毒能止水瀉血痢收白帶白淫可倍加茯苓為丸  
服之此外如散血定痛傳癰毒消結核癭瘤惡瘡腐肉白癩  
野班瘰肉收脫肛陰挺殺痔漏諸虫止金瘡血出生肌長肉  
或為末可摻或用醋調敷俱妙能解酒酸亦解酒毒

# 禽獸部

雞血 二六二

味鹹性平主療痿痺中惡腹痛解丹毒蠱毒蟲毒鹽酒毒及小兒驚風便結亦能下乳俱宜以熱血服之若馬咬人傷宜以熱血浸之

雞冠血治白癩風經絡風熱塗額頰治口喎不正卒灌之治溢死欲絕及小兒卒驚客忤和酒服發痘最佳塗諸瘡癬蜈蚣蜘蛛馬嚙等毒若百虫入耳宜用熱血滴之

鴨血 二六三

味鹹微涼善解諸毒凡中金銀丹石砒霜鹽酒毒者俱宜服此解之若野葛毒殺人至死熱飲之入口即解若溺水死者灌之即活蚯蚓咬瘡塗之即愈

虎骨 二六四

味微辛氣平主百邪惡氣殺鬼精心腹諸痛止驚悸壯筋骨治肢體毒風拘攣走注疼痛辟傷寒溫瘧及惡瘡鼠瘻犬咬諸毒頭骨作枕辟惡夢魘魅置戶上辟鬼祟寇宗奭曰風從虎者風木也虎金也木受金制安得弗從故可治風病攣急走注風毒癩厥驚癇諸病李時珍曰虎骨通可用凡辟邪療驚癇頭風溫瘧瘡疽當用頭骨治手足諸風當用脛骨治腰背諸風當用脊骨亦各從其類也吳球曰虎之一身筋節氣力皆出前足故以脛骨為勝

象牙 二六五

味甘氣涼能清心腎之火可療驚悸風狂骨蒸痰熱鬼精邪氣癰毒諸瘡並宜生屑入藥煮服若諸物鯁刺喉中宜磨水飲之竹木刺入肌肉宜刮牙屑和水敷之即出

鹿角膠二六六

味甘鹹氣溫大補虛羸益血氣填精髓壯筋骨長肌肉悅顏色延年益壽療吐血下血尿精尿血及婦人崩淋赤白帶濁血虛無子止痛安胎亦治折跌損傷瘡瘍腫毒善助陰中之陽最為補陰要藥

鹿茸二六七

味甘鹹氣溫破開塗酥炙黃脆入藥益元氣填真陰扶衰羸瘦弱善助精血尤強筋骨堅齒牙益神志治耳聾目暗頭腦眩運補腰腎虛冷脚膝無力夜夢鬼交遺精滑泄小便頻數虛痢尿血及婦人崩中漏血赤白帶下道家云惟有班龍頂上珠能補玉堂關下血者即此是也若得嫩而肥大如紫茄者較之鹿角膠其功力為倍倍

犀角二六八

味苦辛微甘氣寒氣味俱輕升也陽也其性靈通長於走散較諸角為甚藥用黑色功力在尖專入陽明清胃火亦施他藏涼心定神鎮驚瀉肝明目能解大熱散風毒陽毒瘟疫熱煩磨汁治吐血衄血下血及傷寒畜血發狂發黃發斑謔語痘瘡稠密內熱黑陷或不結痂亦散瘡毒癰瘍膿血腫痛殺妖狐精魅鬼疰百毒蠱毒鈎吻鳩羽蛇毒辟溪瘴山嵐惡氣其性升而善散故治傷寒熱毒閉表煩熱昏悶而汗不得解者磨尖攪入藥中取汗速如響應仲景云如無犀角以升麻代之者正以此兩物俱入陽明功皆升散今人莫得其解每致疑詞是但知犀角之解心熱而不知犀角之能升散尤峻速於升麻也倘中氣虛弱脈細無神及痘瘡血虛真陰不足等證凡畏汗畏寒畏散者乃所當忌或不得已宜兼補劑用之



羚羊角 二六九

味鹹性寒辛本火畜而此則屬木善走少陽厥陰二經故能清肝定風行血行氣辟鬼疰邪毒安魂魄定驚狂祛魘寐療傷寒邪熱一切邪毒中惡毒風卒死昏不知人及婦人子癇強瘞小兒驚悸煩悶痰火不清俱宜爲末蜜水調服或燒脆研末酒調服之若治腫毒惡瘡磨水塗之亦可

牛黃 二百七十

味苦辛性涼氣平有小毒忌常出入心肺肝經能清心退熱化痰涼驚通關竅開結滯治小兒驚癇客忤熱痰口噤大人癲狂痰壅中風發瘞辟邪魅中惡天行疫疾安魂定魄清神志不寧聰耳目壅閉療痘瘡紫黑色痰盛躁狂亦能墮胎孕婦少用

阿膠 二七一

味甘微辛氣平微溫氣味頗厚陽中有陰製用蛤粉炒珠入肺肝腎三經其氣溫故能扶勞傷益中氣其性降故能化痰清肺治肺癰肺痿欬唾膿血止嗽定喘其性養血故能止吐血衄血便血尿血腸風下痢及婦人崩中帶濁血淋經脈不調其味甘緩故能安胎固漏養血滋腎實膜理止虛汗托補癰疽腫毒用惟鬆脆氣清者爲佳堅韌臭劣者不美

熊膽 二七二

味苦性寒能退熱清心療時氣黃疸平肝明目去翳障殺虻螭螻牙虫風痛及小兒熱疳熱痰驚癇癩癧瘡疔蠶熱痢俱宜以竹瀝化兩豆粒許服之甚良亦治鼻瘡熱瘡痔漏腫痛以湯化塗之少加冰片尤效欲辨其真惟取一粟許置水面如線而下一道不散者是也且凡是諸胆皆能水面辟塵惟此尤速乃亦可辨

味苦辛性溫能開諸竅通經絡透肌骨解酒毒吐風痰消積聚癥瘕散諸惡濁氣除心腹暴痛脹急殺鬼物邪氣魘寐藏腑虫積蛇虫毒蠱毒瘴毒沙虱毒及婦人難產尤善墮胎用熱水研服一粒治小兒驚癇客忤鎮心安神療鼻塞不聞香臭目疾可去翳膜除一切惡瘡痔漏腫痛膿水腐肉面黥斑疹凡氣滯為病者俱宜用之若鼠咬蟲咬成瘡但以麝香封之則愈欲辨真假但置些須於火炭上有油滾出而成焦黑炭者肉類也此即香之本體若燃火而化白灰者木類也是即假攪

# 虫蝨魚部

龍骨 二七四

味甘平性收澁其氣入肝腎故能安神志定魂魄鎮驚悸澁腸胃逐邪氣除夜夢鬼交吐血衄血遺精夢洩收虛汗止瀉痢縮小便禁腸風下血尿血虛滑脫肛女子崩淋帶濁失血漏胎小兒風熱驚癇亦療腸癰臟毒內疽陰蝕斂膿斂瘡生肌長肉澁可去脫即此屬也制須酒煮焙乾或用水飛過同黑豆蒸熟晒乾用之

海螵蛸 二七五 即烏賊魚骨

味鹹性微溫足厥陰少陰肝腎藥也鹹走血故專治血病療婦人經枯血閉血崩血淋赤白帶濁血癥氣瘕吐血下血臍腹疼痛陰蝕瘡腫亦治痰瘧消癭氣及丈夫陰中腫痛益精固精令人有子小兒下痢膿血亦殺諸蟲俱可研末飲服尤治眼中熱淚磨翳去障並宜研末和蜜點之為末可傳小兒疳瘡痘瘡臭爛膿濕下疳等瘡跌打出血湯火諸瘡燒灰存

性酒服治婦人陰戶嫁痛同雞子黃塗小兒重舌鵝口同蒲黃末傅舌腫出血如泉同槐花末吹鼻止衄血同麝香吹耳治停耳耳聾○烏賊魚善補益精氣尤治婦人血枯經閉

牡蠣二七六

味微鹹微溫氣平用此者用其溫能固欬鹹能稟堅專入少陰腎藏隨藥亦走諸經能解傷寒溫瘧寒熱往來消痰血化老痰去煩熱止驚癇心脾氣痛解喉痺欬嗽疝瘕積塊痢下赤白澁腸止便禁鬼交遺瀝止滑精帶下及婦人崩中帶漏小兒風痰虛汗同熟地固精氣禁遺尿同麻黃根欬陰汗同杜仲止盜汗同白朮燥脾利濕同大黃善消癰腫同柴胡治脇下硬痛同天花茶消上焦癰瘰癧結核

穿山甲二七七

味鹹平性微寒能通經絡達腠理除山嵐瘴氣瘧疾風痺強

直疼痛療小兒五邪驚啼婦人鬼魅悲泣下乳汁消癰腫排膿血除瘡疥痔漏通竅殺虫佐補藥行經善發痘瘡或炮焦投入煎劑或燒灰存性酒服方寸七亦可用傅惡瘡

青魚膽二七八

味苦性寒其色青故入肝胆二經能消赤口腫痛點暗目可吐喉痺痰涎塗熱瘡惡瘡亦消魚骨之鱗

白花蛇二七九

即蕘蛇也

味甘鹹性溫有毒諸蛇鼻俱向下惟此蛇鼻向上而龍頭虎口黑質白花脇有方勝紋二十四個口有四長牙尾上有一拂指甲者是用宜去頭尾各三寸以防其毒春秋酒浸三宿夏一宿冬五宿火炙去盡皮骨取肉焙乾密封藏之久亦不壞諸蛇之性皆窺而此蛇尤速故善於治風能透骨髓走藏府徹肌膚無所不到療中風濕痺骨節疼痛手足拘攣不能

行立暴風瘙痒破傷風大風癩癬及小兒驚風搐搦癩癧楊梅風毒惡瘡俱為要藥凡服蛇酒藥者切忌見風

真珠二百八十

味微甘微鹹能鎮心明目去翳磨障塗面可除黥班令人潤澤好顏色亦除小兒驚熱安魂魄為末可傅痘疔痘毒

龜板二八一

味微甘微鹹性微寒陰也能治痰瘧破癥堅祛濕痺傷寒勞役骨中寒熱消五痔陰蝕諸瘡下甲能補陰血清陰火續筋骨退勞熱療腰脚痠痛去瘀血止血痢漏下赤白利產難消癰毒燒灰可傅小兒頭瘡難燥婦人陰瘡癩瘡亦治脫肛龜板膏功用亦同龜板而性味濃厚尤屬也陰能退孤陽陰虛勞熱陰火上炎吐血衄血肺熱咳嗽消渴煩擾熱汗驚悸譫妄狂躁之要藥然性稟陰寒善消陽氣凡陽虛假熱及脾

胃命門虛寒等證皆切忌之毋混用也若誤用久之則必致敗脾妨食之患

蠶蚕二八二

味辛鹹性溫有小毒辛能散鹹能降毒能攻毒輕浮而升陽中有陰故能散風痰去頭風消結核癩癧辟痰瘧破癥堅消散風熱喉痺危證尤治小兒風痰急驚客忤發痘瘡攻疔毒止夜啼殺三虫婦人乳汁不通崩中帶下為末可傅丹毒疔腫拔根極效滅頭面黥班及諸瘡癩痕金瘡痔瘻小兒疔蝕牙齦潰爛重舌木舌及大人風虫牙痛皮膚風疹瘙癢

蟾蜍二八三

俗名癩蝦蟆

眉間有兩囊通身有顆磊其中俱有蟾酥行極遲緩不能跳躍亦不解鳴者是也此物受土氣之精土應月魄賦性靈異穴土食虫能制蜈蚣入足陽明胃經消瘴氣積聚破堅癥腫

景岳全書  
卷之四  
三  
脹治五疳八痢及小兒勞瘵疳熱殺疔蟲消癰腫鼠瘦陰疔  
惡瘡若治破傷風宜同花椒爛入酒煮熱飲之通身汗出  
卽愈亦解狗犬毒燒灰油調傳有虫諸惡頑瘡極效又治瘟  
毒發斑危劇者去腸生痔一之枚絞汁飲之無不卽瘥或燒  
灰湯送亦良

蟾酥 味辛麻性熱有毒主治發背癰疽疔腫一切惡毒若  
治風虫牙痛及齒縫出血以紙撚蘸少許點齒縫中按之卽  
止

水蛭二八四

味鹹苦性微寒有毒能逐惡血瘀血破血癥積聚通經閉和  
水迫墮胎唾赤白遊癰癰疽腫毒及折傷跌撲瘀血不散制  
川之法當取田間嚙人腹中有血者佳須晒乾細剉以微火  
炒黃熟方可用或以久收猪脂煎令焦黃用之亦可不爾入  
腹則活最能生子害人若受其害惟以田泥水或黃土水飲  
數升則必盡下蓋此物得土氣卽隨土而走也或以牛羊熱  
血一二升同猪脂飲之亦下也

鱉甲二八五

味鹹氣平此肝脾腎血分藥也能消癥瘕堅積療溫瘧除骨  
節間血虛勞熱婦人血癥惡血漏下五色經脉不通治產難  
能墮胎及產後寒熱陰脫小兒驚癇斑痘煩喘亦消瘡腫腸  
癰撲損瘀血飲潰毒去陰蝕痔漏惡肉然須取活鱉大者去  
肉用醋煮乾炙燥用之若諸者熟肋骨露出者不堪用

蜈蚣二八六

一名卽蛆赤足者良

味辛溫有毒能噉諸蛇殺諸蛇蟲魚鬼疰諸毒去三蟲攻痺  
癰便毒痔瘻丹毒亦療小兒驚風癰風丹毒禿瘡然此蟲性  
毒故能攻毒不宜輕用若入藥餌須去頭足以火炙熟用之

蟬脫二八七

味微甘微鹹性微涼此物飲風吸露氣極清虛故能療風熱之證亦善脫化故可療痘瘡壅滯起發不快凡小兒驚癇壯熱煩渴天吊口噤驚哭夜啼及風熱目昏翳障疔腫瘡毒風疹癢痛破傷風之類俱宜以水煎服或爲末以井花水調服一錢可治瘡啞之病

班蝥二八八

味辛性熱有大毒能攻鼠瘻癰瘡疽破血積疔痕墮胎元解疔毒獠犬毒沙虱蠱毒輕粉毒亦傳惡瘡去死肌敗肉制用之法須去翅足同糯米炒熟然後可用或同麩炒或同醋煮皆可若中其毒惟黑豆綠豆汁靛汁黃連濃茶葱汁可以解之

蜂房二八九

味微甘微鹹有毒療蜂毒腫毒合亂髮蛇脫燒灰以酒服二方寸七治惡疽附骨疽疔腫諸毒亦治赤白痢遺尿失禁陰痿煎水可洗狐尿瘡乳癰蜂螫惡瘡及熱病後毒氣衝目漱齒牙止風蟲牙痛炙研和猪脂塗瘰癧成瘻

五靈脂二百九十

味苦氣辛善走厥陰乃血中之氣藥也大能行血行氣逐瘀止痛凡男子女人有血中氣逆而腹脇刺痛或女人經水不通產後血滯男子疝氣腸風血痢冷氣惡氣心腹諸痛身體血痺脇肋筋骨疼痛其效甚捷若女中血崩經水過多赤帶不止宜半炒半生酒調服之亦治小兒氣逆癩癧殺虫毒解藥毒行氣極速但此物氣味俱厚辛羶難當善逐有餘之滯凡血氣不足者服之大損真氣亦善動吐所當避也制用之法當用酒飛去砂石晒乾入藥

全蝎二九一

味甘辛有毒蝎生東方色青屬木足厥陰肝經藥也故治中風諸風開風痰口眼喎斜半身不遂語言蹇澁痰瘧耳聾疝氣風瘡癰疹小兒風痰驚癇是亦治風之要藥

文蛤二九二

即五倍子

味酸澁性微涼能斂能降故能降肺火化痰涎生津液解酒毒治心腹疼痛夢洩遺精瘰癧腫毒喉痺止欬嗽消渴嘔血失血腸風臟毒滑洩久痢痔瘻下血不止解蠱毒虫毒婦人崩淋帶濁子宮不收小兒夜啼脫肛俱可為散服之若煎湯用可洗赤眼濕爛皮膚風濕癰癩腸痔脫肛為末可傅金瘡折傷生肌斂毒

百藥煎二九三

即五倍子釀造者

味酸澁微甘功用與五倍子頗同但經釀造而成其氣稍浮其味稍甘而純故用以清痰解渴止嗽及收斂耗散諸病作丸噲化為尤佳及治下焦滑洩諸病亦更優也

蝸牛二九四

負殼而行者

味鹹性寒有小毒能清火解熱生研汁飲消喉痺止消渴鼻衄通耳聾治腫毒痔漏療小兒風熱驚癇加麝香搗菴臍間大利小便亦傳脫肛及治蜈蚣蠱毒俱宜研爛傳之無殼者名蜒蚰治熱瘡癰毒腫痛少入冰片研塗痔漏脫肛熱痛最良解蜈蚣毒尤捷

蚯蚓二九五

味鹹性寒沉也陰也有毒能解熱毒利水道主傷寒瘧瘧黃疽消渴二便不通殺蛇痕三蟲伏尸鬼注蠱毒射罔藥毒療癲狂喉痺風熱赤眼瞎耳鼻癰癧陰囊熱腫脫肛去泥鹽化為水治天行瘟疫大熱狂躁或小兒風熱癲狂急驚飲汁

最良亦可塗丹毒漆瘡炒爲末服可去虻蟲亦可傅蛇傷腫痛蜘蛛傷毒入葱管化汁可治耳聾及蚰蜒入耳若中蚯蚓毒者惟以鹽湯浸洗或飲一杯皆可解之

糞名六一泥可塗火瘡疥癩熱毒亦止消渴解瘟疫煩熱狂躁利小水通五淋熱閉疼痛

桑螵蛸 二九六

卽螳螂育子房也深秋作房粘著桑枝之上房長寸許大如拇指其內重重有隔每房有子如蛆卵子是也味甘微鹹性平能益氣益精助陽生子療男子虛損陰痿夢遺疝瘕遺尿治女人血閉腰痛通五淋利水通炮熟空心食之可止小便不禁

## 人部

童便 二九七

味鹹氣寒沉也陰也鹹走血故善清諸血妄行止嘔血欬血衄血血悶熱狂退陰火定喘促降痰滯解煩熱利大小兩便療陽暑中暈聲瘖撲損瘀血暈絕難產胎衣不下及蛇犬諸虫毒傷若假熱便溏胃虛作嘔者俱不可妄用

紫河車 二九八

一名混沌衣

味甘鹹性溫能補男婦一切精血虛損尤治癩癘失志精神短少怔忡驚悸肌肉羸瘦等證此舊說也但此物古人用少而始於陳氏本草自後丹溪復稱其功遂爲時用予於初年亦惑於以人補人之說嘗制用之及用之再三則無所奇效且制用之法若生搗之則補不宜生若頓熟烘熟則亦由肉舖之類耳又嘗見有以酒煮而食之者後必破腹泄瀉總亦因其性滑也近復有以純酒煮膏去粗收貯而日服其膏者



較前諸法似爲更善然其既離毛裏已絕生氣既無奇效又胡忍食之以殘厥子之先天東方朔曰銅山西崩洛鍾東應此母子自然之理不可不信故并述此以勸人少用可也

血餘 二九九

味微苦性溫氣盛升也陰中陽也在古藥性不過謂其治欬嗽消瘀血止五淋赤白痢疾療大小便不通及小兒驚癇治噎噎癰疽疔腫燒灰吹鼻可止衄血等證然究其性味之理則自陰而生自下而長血盛則髮盛最得陰陽之生氣以火炮制其色甚黑大能壯腎其氣甚雄大能補肺此其陰中有陽靜中有動在陰可以培形體壯筋骨托癰疽在陽可以益神志辟寒邪溫氣海是誠精氣中最要之藥較之河車鹿角膠陰凝重著之輩相去遠矣凡補藥中自人參熟地之外首當以此爲亞

人中白 三百

味鹹性微涼能降火清痰消瘀血止吐血衄血退勞熱清肺癰肺痿心膈煩熱燒研爲末大治諸濕潰爛下疳惡瘡口齒疔蝕蟲蟹腫痛湯火諸瘡及諸般出血生肌長肉善解熱毒或生用爲末亦可

